

# MISSION MOTIVATIONAL TOUR

July 26-31, 2013

## REPORT



AN INITIATIVE OF PROJECT NEHEMIAH  
EVANGELICAL BAPTIST CONVENTION CHURCH, DELHI

*an initiative of project nehemiah  
evangelical baptist convention church, delhi*

... COME LET US REBUILD THE WALL OF JERUSALEM, AND WE  
WILL NO LONGER BE IN DISGRACE

- NEHEMIA 2:17B

# content

---

KHENPI	THUPI	PEK
	<i>TOUR TEAM</i>	<b>04</b>
	<i>THUMAPI</i>	<b>05</b>
	<i>REPORT</i>	<b>07</b>
1.	<i>INTRODUCTION</i>	<b>07</b>
2.	<i>PROJECT NEHEMIA PHUNGVUHTUTE' PANLAK DAN TANGPI</i>	<b>08</b>
3.	<i>MISSION MOTIVATIONAL TOUR: ZINNA LEH LAM PAINA</i>	<b>09</b>
	<i>Ni Masa (July 26, Sintawpni)</i>	<b>09</b>
	<i>Ni Nihna (July 27, Kiginni)</i>	<b>09</b>
	<i>Ni Thumna (July 28, Pathianni)</i>	<b>10</b>
	<i>Ni Lina (July 29, Seppatni)</i>	<b>11</b>
	<i>Ni Ngani (July 30, Sepnawnni)</i>	<b>11</b>
	<i>Ni Gukna (July 31, Nilaini)</i>	<b>12</b>
4.	<i>HUN ZATDAN TANGPI</i>	<b>13</b>
	<i>Pastor's Thupuak Tomkim</i>	<b>14</b>
5.	<i>MUHDAN LEH THUSUN KHENKHAT</i>	<b>14</b>
	<i>Infrastructure</i>	<b>15</b>
	<i>Sinsaktute</i>	<b>16</b>
	<i>Naupangte</i>	<b>18</b>
	<i>School Kivaipuak Dan</i>	<b>19</b>
	<i>EBC Headquarter Panlakna</i>	<b>19</b>
6.	<i>THUKHITNA</i>	<b>21</b>

## TOUR TEAM

### BYF ADVISER:

1. Pastor V. Nenglian

### BYF COMMITTEE MEMBERS:

2. Mr. L. Chinhaugou, Chairman
3. Mr. Thangzasia Paite, Vice Chairman
4. Mr. K. Muanthang Ngaihte, Secretary
5. Mr. H. Tunkhanmuan, Asst. Secretary
6. Ms. Nancy Chinghoih, Finance Secretary
7. Mr. Goulal Hangzo, Secretary, Music Dept
8. Ms. Kimremmawi, Asst. Secretary, Music Dept
9. Mr. Thangchinlian Phaipi, Committee Member, EBCC Central Delhi

### TUAILAI MEMBERS:

10. Mr. Sumthanlian Suantak
11. Mr. Siam Naulak
12. Mr. Jonathan Naulak
13. Mr. Malsawm Tunlut
14. Mr. Pauminlian Tangpua
15. Ms. Priscilla Ngaihlian

## THUMAPI:

**PROJECT NEHEMIA** kichi, Baptist Youth Fellowship (BYF) heutu masate leh EBCC Delhi heutu lian te'n zoudawn siamsinna dinmun kise takmai tun ding nawn ding awlmohna a, thumna tampi toh ana pat uh ahi. Kum 2009 a ana kipan, Pathian vualzawlina toh paizom zel in, tukum 2013 a kum nga (5) chingta hi. Hiai project in a tuppen ahiehleh, EBC Saptuam in zoudawn a Mission school a neihte' taksap tampite awnghutu a hih theih bangbang a pan ding, chih ahi.

Tua toh kiton in, kum li (4) paisa sung in EBC Headquarter toh kikhutzop ngiitngeet in, siamsinna innte leh siamsin naupangte a ding nna poimoh taktak bangzah hiam sepkiak in omta. A kipat chiil in infrastructure lam piibawl hi deuh a - school building kisiate repair, building thak leh staff quarter te lamsak, library leh laboratory vanzat leisak chihte nasep khiak tangpi ahi. A kum thum (3) na ah, Project ana hamphat pih kha school te'n, i gam a sing-le-lou tul gawp ding dinmun awlmohna toh pan la thei ihi, chihna in, singnou ana suan ding uh Project Component khat in ki koih hi. Abiik in, Convention English School, Mimbung in ana taksuah ua, singkung tamtak ana suan hing uh ahidhan bang theih a om chiangin kipahna lian mahmah hi. Huchi'n a kum li (4) na apan focus hong ki kheng zek nawn a, zoudawn a siamsin naupangte'n quality education a ngah theihna ding ua poimoh mahmah tuh sinsaktute a tamtheipen a taat-hiam (equip) kisam ahi chih phawk in, amaute zat phatuam ding English Pronouncing Dictionary leisak, training course sponsor chihte in pan ana kila hi.

Tukum pen Project kum nga (5) chinna ahihtoh kiton in, thrust area thum (3) a khen in, pan nak zawsem a lak ding ki hanchiam hi. Hiai thrust area thum-te: Teachers' Empowerment/ Capacity Enhancement, Infrastructure Building leh Students' Motivation.

Teachers' Empowerment lam sepsuahna in June 17-29, 2013 sung Evan Teachers' Summer Condensed Course kichi training programme, Director (Institutions), EBC panlakna nuai ah sai in om a, tua hun ah Team Project Nehemia in Resource Person mi li (4) thoh in, ni nih sung (June 28 & 29) Session va kila hi. Reference Booklet hoihtak leng bawlkhiak in om.

Huaiban ah, Students' Motivation toh kisai in, zoudawn va siik a, siamsin naupangte toh hun va zangkhawm a, zoudawn siamsinna dinmun mit ngei a va mu ding, kum paisate a Project tungtawn a sepsuahsa muh theih om bangbangte va enkhia a, maban a sep tuak, panlak behna tuak bangbang omhiam chihte va theih sawm ding lunggulhna lianpi om hi. Tuabang mah in, Ministerial Committee, EBCC Delhi in leng zoudawn a Saptuamte va veh a, kihihhaat tuah ding lunggulhna toh year plan ah hon guang ua, lemtaang takin hiaigel gawmkhawm theih in hong om hi. Huchi'n Mission Motivational Tour 2013 chia minvuah in July 26-31, 2013 sung Pastor V. Nenglian makaih in tuailai mi 14 te'n zoudawn veh in kal va kisan hi. Zoudawn a i mi-le-sate dinmun mit mahmah a va mu in, sinlai naupangte, sinsaktute leh nu-le-pate banah zan giah-khakna khua a Saptuam mipite toh kithuahkhawmna hun manpha tak va kizang hi. Hiaibang a kalsuan theidia hon pi Toupa' min phat in om hen!

Tu in, hiai Mission Motivational Tour a paite hun va zatdan tangpi, mit a ava muh uleh bil a ava zaakte uh tungtawn a kipahna leh lungsim a awlmoh hong piangte report hong ki bawl hi. Hiai ding a tha-le-zung, hun leh sum-le-pai tamtak seeng a pan honla Project Nehemia Study Team te tungah kipah thu gen hang.

Banah, hiai Mission Motivational Tour hong pian theihna ding a hon phalsak, a poimoh zahzah pan hon lakpih kia hilou, tour sung peuhmah hong makaih Rev. V. Thangkhingin, Director (Institutions), EBC tungah kipahna lian lua hi.

Hiai report sunga thutuun te BYF, EBCC Delhi in, zoudawn a i school te poimohna phawk kawm a maban a hoihzawkna ding deihna lungsim siangthou leh dik pu a agelh ahi.

Toupa'n thupina tengteng tang hen aw!

New Delhi  
December 31, 2013

(L. CHINHAUGOU)  
Chairman, BYF, EBCC Delhi

## REPORT:

### 1. INTRODUCTION

1.1 I gam siatna, abiik in state government nuai a siamsinna (educational system) puksiat gawpna ziaak in, i mi-le-sa genthei diakte'n kithuak nak mahmah hi. Hiai bang dinmun setak a om a, khangsawnte' maban ding saupi bing leh patauh huai a i omlai in, lam-etna hon pia, siamsinna meivak ana tawi ngiitngeet i Saptuam' school te leh semtute ahi uhi. Siamsinna loungal salam a i suahtakna ding lampi omlou ahildan phawk a, am-aute' taksap tampite hih theih bangbang a awnghutu dia panla Project Nehemia in, a kum nga (5) chinna toh kiton a zoudawn mahmah va siik a, siamsin naupang iit huai taktakte leh sinsaktute dinmun va mu ding in vakal suan hi. Hiai a kal va suante'n agal apan ngaihtuah phaklounh lungsim hon dawt thil tampi va kituak in, kipahna, khasiatna mittui nul hunte tam in, veina thak liantak toh khosakna/siamsinna mun Delhi kitungkik hi.

1.2 Siamsinna kia lou, neek-le-taak zonna, damlou tuahsiat hun a ki-etkolna, kikawmtuahna leh gam vaihawmna mahmah selua ahil man a, a hithei liaiteng in zoudawn a i khuate i peemsan zungzung lai un, tamtak te'n taisan mai lou in a na teeng lai uhi. Deihtel thei dinmun a ding hile uh tuabang a teengte leng tamtak pemkhia om tham ding un gintak huai. Mun dang, Lamka zaang leh khopi tuamtuam a khosa, hun tomchik adia va zin zual te' va muhdan in bubit bang vasak in om mahleh, teengtute' lungsim ah bit kisak taktak na om hiam, chih bel ngaihtuah tham ching ahi. Bangteng hileh, hiaibang a ana teeng liailiaite tuh i gam inn-ngaktu diktak ahi ua, zahtak huai uhi. Amaute ziaka i gam i chih theih ding nei lai hamham leng kihikha ding hi.

1.3 Zoudawn a i mi-le-sate taaksap genseeng ding ahikei. Pathian vualzawlina dong a, khopi lianzaw a khosate'n a hidi mawng a i ngaih, taksap theih dia leng i koihlouh tampi te amau' a dingin thil manpha taktak ana hilai hi. Himahleh, tuabanga taksap tampi toh leng, lungkim dan kisin a khosak siam mahmah ua, thupi hi. Tuabang kawm kal ah, am-aute a ding a hamphatna omtheite nasan laaksuh leh neeksak a, huchibang hamphatna om ahilam leng theisaklou tute kua dang hilou a, kum tam pai nailou hial a amau leng hiaibang haksatna dinmun apan ana suakta, i mi-le-sate khawng mah ahil maimah chiang un lungsim na diak hi. Naupang piangkhe taphot in hiaibang haksatnate ahi ding mawng a ngai a, taksap tampi mah toh hong khosak touhtouh ding uh bangtan i en ngam dia? Hagar in, 'Naupang si ding ka en ngamkei' chia a taisan sawm bang a en leng i naupang neu chikchikte gentheihnate en ngamlou a nungngat san mai di ihi diam?

1.4 Project Nehemia in awlmohna toh pan la touzel mahleh, mihing et in a sum muhsuah leh a sepsuahte tam hetlou hi. Kisaktheih pih tham leng a hikei. Himahleh, mihing etna kheel lam ah, Pathian in vualzawlina in vuk a, lam-etna tuntuu (a Project of HOPE) ahildan muh thakthak in om hi. I mi-le-sate'n hiai Project a poimoh nawnlouh hun uh hong tun ding ngaklah huai mahmah ahilalai in, huai hun hong tun mateng sep ding inei hi.

## 2. PROJECT NEHEMIA PHUNGVUHTUTE' PANLAK DAN TANGPI

2.1 Khopi, abiik in, Delhi khopi a EBCC Saptuam mi omte a taangpi in siamsin, sepna nei leh a zong lellel te hi uhi. Tua ziak mah in, tuailai saptuam ahi chi leng ki genkhial lawmlawm lou ding hi. Hiai tuailaite leh khovel khosakna leh sepna a dinmun lian huntawk taktak nei khosakhawm te' awlmoh leh vei pen tuh i gam dinmun ahi. Houlimna leh pawlpi tuamtuam' programme te ah leng a kigen tampen thute hiaite mah ahi.

2.2 Project Nehemia kipat chiil apan, tawInga-lou a phungvuh ngiitngeet te, tuailaite hi uhi. Khopi liantak ahihziakin, BYF kivaipuakna zangkhai zaw ding ngiimna in, tuailaite Area tuamtuam 12 bang in kikhen hi. Tuate ah Area Coordinator, Project Promoters leh Usher Leader ding kiguang tiltel in, amaute' makaihna in area biakkhawmna (fellowships), Biakinn a mipi kikhopna a ushering lam peuhmah leh Project Nehemia phungvuhna dia tuailai milip panlakna te sepsuah ahi. Project phungvuhna hiaibang in ki organize hi:-

- (a) Tuailai milip kiangah Project Nehemia Box kikoih hi. Tuailaite'n mahni phal bangbang, a tawmlua, tamlua chih omlou in, ana khezel ua, hiaite Area heutute'n (abiik in Project Promoters) awlmoh leh kuhkal takin kha tengin inn chih a lut in hon kaikhawm zel uhi.
- (b) EBCC Delhi ah Project Nehemia Drop Box kikoih a, awlmoh leh phungvuh ut peuhmah te'n phal bangbang khezel uhi.
- (c) BYF Committee in fund raise na tuamtuam - T-shirt bawl, gari sawp a ki-loh, souvenirs (table clock/pen stand/pens/button badge leh adangdang) – tungtawn in phungvuhna nna sem zel.
- (d) BYF initiative mai hilou a, EBCC Delhi pumpi project ahihna ah, TBSUC in-leng hong phungvuh pih ngiitngeet hi.

2.3 Project phungvuhtute' awlmohna leh kipiakzohna thupi a, zahtakhuai uhi. Mission Motivational Tour 2013 a i mi-le-sate lak mahmah va siik a kal suanna ding thu hong gin apan tuailaite leh Saptuam mipite lungsim ah Pathian in thu gen a, kihonna liantak om in, hun dang a Project ana phungvuh ngiitngeet ban uah, hiai ading biik a iitna thilpiak hon thohkhawmte uh ziaikin naupangte leh Saptuamte a ding thilpiak manpha taktak kipuak thei hi. Jawlnei Nehemia in agal apan Jerusalem kulhbang segawp tundin nawn ding awlmohna aneih a, pan alak bang a, Nehemia dungsuun i gam setak tundin ding awlmohna lungtang piak a om tuailaite ziaikin Toupa min phat in om henla, amaute nnasep ziaikin i gam ah lam-etna, diktatna, ki-iitna leh Pathian thupina muh semsem in hong omzel hen.



### 3. MISSION MOTIVATIONAL TOUR: ZINNA LEH LAM PAINA

#### *Ni Masa (July 26, Sintawpni):*

3.1 Zingsang in Dorcas' Hall, New Lamka a kingak khawm masa in, Rev. S. Vungminthang, General Secretary, EBC in thumna in hon khakhia hi. Rev. V. Thangkhingin, Director (Institutions) makaih in Tour Team teng gari thum (3) zang in 7:00 am in kipat khiak ahi.

3.2 Lamka apan tumlam manoh in, National Highway 150 (Tipaimukh Road) zui in Pearson mun khosak a Thumna Mual ah sawtlou khawl in, Lamka Khopi gal-et in Hiangkot taang ah ki tailiam tou hi. Hiangkot taang kheng in Tuilaphai, Tuilumzang leh kho dangdang taipel in zinglam 9:30 am vel in Chongkhazou khua kitung a, hotel ah zing ann kine hi. Ann nezou, taikhe nawn in, Mualhoichiang mun ah sawtlou ki khawl. Amin leng Mualhoichiang ahina mah a, etlawm in thoveng mahmah hi. Mual-le-tang gamla khoptak kimu thei a, lim kilakna ding bangin hoih ngial hi. Santing khua sun khen in, Sainoujang, Leizangphai, Suangpehmun kuate taipel in sunnung 1:30pm in tupna mun Thanlon khua kitung hi.

3.3 Thanlon ah Divisional Superintendent, Local Pastor leh saptuam upate'n hon na vaidawn khiukheu uhi. Pastor Quarter ah singpi dawn in ki tawldam zek. Hun kinei hiven, tupdan masa a telkha lou himahleh, Bukpi va siik himhim ding, chi in kidiang khe nawn pah hi. Nitaklam 3:30pm in Bukpi khua ki tungphei a, Convention English School (CES) naupangte na tawp man uh ahihman in Headmaster pa'inn a lut in, school vehna thilpiak piakna neizual in, tuazoh in a khang zek a Bukpi Bethel a saptuam' school building kibawl thak etna leh vehna thilpiak Headmistress in-charge kianga pia in, Thanlon lam ki zuan kiik nawn vengveng a, 5:10pm vel in kitungkik hi. Local Committee te'n zintunna annkuang ana lui ua, huai nezou in nitak Thanlon a Saptuamte toh biakkhawmna hun nuamtak kizang hi.

#### *Ni Nihna (July 27, Kiginni):*

3.4 Zingkal annek ma, 6:30am in Thanlon CES vehna kinei a, naupangte toh dakkal nih (2) vel hun zang khawm in, tuazoh in group photo khawng lakna nei in hun kizou hi. Zing ann nezou, 10:30am lak in Thanlon mangpha khak in kitailiam san a, Vaipheimual leh Dialkhai kuate tawnphei in, Tipaimukh Road apan Khawzawl Road a kihei khia in, Mualpheng khua 10:45am in ki tung hi. Kiginni school khawlni himahleh, Mualpheng khua a naupangte school uniform toh school kongtual ah, banner nalhtak nuai ah ana ding khin dimdiam ta uhi. Vaidawanna la, "We welcome you, we welcome you, for you have come to visit our humble school" chi'n naupangte'n hon sa siausiau ua, kipahna leh kisanlah nna a dim in ki om hi. Hiai school ana tuam deuhna khat ahihleh naupangte lak ah meel tuam deuh, BRO nnasemte' tate bang leng ana om uhi.

3.5 Naupangte toh hun zangkhawm zou, kipan khenawn in, Sumtuh khua taipel in sunnung 1:35pm vel in Khazang khua kitungphei hi. Hiai khua a naupangte, sinsaktute leh Saptuam heutute toh hun zat ding bangbang zat zoh in, singpi khawng dawn in, tangmai hon piakte uh ne in, khua ki nuse nawn hi.

3.6 Nitaklam dak 3:40pm vel in Phaitong khua kilut hi. Phaitong CES te'n namai lou in honna vaidawn ua, Tour Team tengteng pakkhi honna oksak ua, kuapeuh in kipah leh nervous kithuah simchiat hi. School sutu ni chihphet louh, school kai tawp hun le ahitham ta, himahleh naupangte leh sinsaktute'n nileng a uniform toh honna ngak dan uh ahi. School programme teng zoh ahih in, kho mipite' siamna ziak in naupang teng toh nitak ann, nahtang-teh tung ah, kine khawm zaizai hi.

3.7 Nitak in Phaitong EBCC ah biakkhawmna hun nuamtak kizang a, kikhawm tawp-phet 8:20pm in Sinzawl manoh in ki-taikhe nawn ngal hi. Sinzawl khua nitak 9:20pm vel in kilut phei hi. School committee makaih in CES Headmistress Quarter ah honna dawn ua, vaidawna hun saulou zat zoh in, giahna ding a honna gelsak uh - Headmistress' Quarter leh Pastor' Quarter te a tawldam ding in kizuan hi.

*Ni Thumna (July 28, Pathianni):*

3.8 Nipini zing biakna kikhop Sinzawl EBCC ah kizang a, kikhawm tawp in hiai khua a CES vehna kinei hi. Zoudawn a i High School neih omsun ahihban ah hostel nei omsun ahi a, kuapeuh kithalawp chiat hi. Mundang teng sang in naupang ana tamzaw ua, sutu ni himahleh naupang tamtak hong paikhawm thei uhi. Hiai khua etton taak mahmah na tuh, saptuam pawl tuamtuum om mahleh, school kineih tuam lou in EBC school ah kaikhawm thei uh a, naupangte' hamphatna hi sawnsawn hi. Hiai hun ah school building thak kibawl latkhiakna leng Director (I) in nei hi.

3.9 School programme zoh in, Tour Team in Siamsin Hostel vehna hun saulou kizang nawn hi. Hostel ah naupang tampi omkei mahleh, neu chikchik, nu-le-pa ngai a kap thei lai leh kilawm hial bang, leh kho tuamtuum, abiik a Mizoram Daidou leh North-East Tangnuam khua a kipante khawng a kimuh Chiang in lungsim hon khoih a, nu-le-pa kuapeuh in siamsinna i ngaih poimoh tak dan uh muh theih mai hi. School leh hostel naksem a phungvuh zou hilehang tuasang mah a lonzaw lai ding a, zoudawn adia model hithei ding hitah e, chih in om hi. Hostel warden & ward te fel un phathuai thei mahmah uhi. Hosteller te'n 'We will reap the harvest if we do not give up' (Galatians 6:9) pansan a lemchiin tom (short play) hon lah un lungsim hon khoih mahmah. Programme zoh in nitak ann nek-khawmna Hostel compound ah kinei. Nitak in saptuamte toh biakkhawmna nanung zat-khawm hinawn.

*Ni Lina (July 29, Seppatni):*

3.10 Zing dak 6:00am vel in a minthang Guite Road zui in Khuanggin khua manoh in kitaikhe nawn. Guite kual a lui minthang Tuivai lei tung ah kihihhahna hun zang zek in, Tuivai zaang a om Khuanggin khua dak 7:00am in kilut pheih hi. Khuanggin CES Headmaster makaih in naupangte'n 'When We All Get To Heaven' chih laa toh Biakinn sung ah honna vaidawn uhi. Naupangte, sinsaktute, saptuam heutute leh nu-le-pate toh hun saulou zangzou in, Songtal zuan in kipat khiak hinawn.

3.11 Tipaimukh Road toh teh in Guite Road ana sezaw lai a, zuihmoh bel hisam lou hi. Tuivai kuam kualsim tak a tai kawikawi nung in, 9:56am vel in Songtal khua kilut tou hi. Pastor' Quarter kong ah, vaidawna chibai kibuk sauhauh kawmin, atung masasa innsung a lut siausiau in, singpi khawng dawn in ki-tawldamzek. Tua zoh in Songtal CES naupangte toh zing ann nekkhawmna hon neihpih uhi. Ann nezou school naupangte toh programme bangtan hiam zat zoh ahih in, 1:10pm in Mualnuam khua zuan in kitaikhe nawn hi.

3.12 Sunnung dak 1:40pm vel in Mualnuam khua kilut a, Grace English Jr. High School a naupangte school kai ana tawp man mahle uh, heutute'n hon samkhawm thak in, kithu-ahkhawmna hun khamlou tak in kizang hi. Tua zan Mualnuam khua a giak in, nitak biakna programme khotual EBCC te toh nuamtak in kizang. Rev. V. Khamvum, D.S, Singngat in Singngat khua apan hong pai vengveng in Mualnuam khua ah Tour Team te hong dawn a, tour programme omlai teng hong tel ziak in hon nuamsak tuan mahmah hi.

*Ni Ngana (July 30, Sepnawnni):*

3.13 Zing ann nezou, dak 8:00am vel in Mualnuam khua mangpha khak in Thuangtam kizuan leuleu hi. Thuangtam CE school a hun saulou zang in, 10:23am in ki nuse nawn. Paikhiak dek in khomite'n lampi a na nek ding uh, chi'n lengthei tampi hon pia ua, kipahna lian mahmah.

3.14 Thuangtam apan kipankhia in, zing dak 10:40am in Tuimazang khua kitungsuk hi. Hiai khua a CES pen, Project Nehemia nuai a 2011 kum a school building ana ki lamsak ahi. Huihpi'n mutsiat sak mahleh EBC Headquarter in lamsak thak nawn a, building leng ana hoih mahmah hi. Naupangte leh heutute'n tangmai tamtak, Project Nehemia tunga kipathu leh lungkhoih huai taktak thu kigelh, staff room a table dim zen in ana koih-khawm venvon mai uhi. Thu kigelhte muh in khasiat tha lamlam bang suak hial hi.

3.15 Tuimazang a hun aamtak a zang zou in, ki taisan nawn. Lungthul (D) nitaklam dak 2:00pm in ki tungpheih hi. Pastor' Quarter ah vaidawna hun saulou kizang a, sun ann limtak honna bawlsak uh kine. Tuazoh phet in, Daizang English School, kho gal a mualtung a thoveng tak a om viuveu, vehna hun saulou kinei. Maban lam sau mahmah lai, kizekai simta ahihman in khamlou tak a nutsiat nawn pah ngai hi.

3.16 Dak 4:30pm in Bualzang khua kitung phei a, huai ah Tuilakzang leh Bualzang khua a naupangte kigawm in banner leh placard khawng toh lamlian a ana ding in honna vaidawn ua, amau toh leng hun saulou kizang nawn hi. Tuilakzang CES ahihle, Project Nehemia tungtawn a sepsuah masapen – a school building ki bawlsak ahi. A school building ngei leng muh uthuai lua hinapi in, Tuilak lui gal a om, lampi in tawn kha chiahlou ahihziak in va en manlou in kipaisan hi.

3.17 Manmoh tak a kipankhia in, 5:50pm in Lungthul (T) kitung phei nawn hi. Khua sesim, vuah zu nipnip lak ah, Saptuam mipi paikhawm thei teng toh EBCC Biakinn ah hun saulou zatna kinei. Zing dak 10:00am a tangmai semsa toh honna ngak uh, nitak khomui a kine kha pan. Lungkimlouh thu bangmah zak a omlou hizomah dan ahi. Tangmai semsa, lian pipi a aat, Chiang maamtak a sutsa in hon hawm ziahziah ua, lim ngial hi. Hiai khua chiamteh thamna ahihle Saptuam' school ah naupang 2 leh sinsaktu 1 om uhi. Teacher-Student ratio hoihna pen a chiamteh ahi.

3.18 Khua in hon mialkhumta, tupna mun kitung zou nailou ahihziak in kin-le-buang a taikhe nawn in, 6:30pm in Suangdoh khua kitung zou khong hi. EBCC Biakinn huangsung a tailut in, puansilhte leng bangmah kikhek chih omse lou in Suangdoh a saptuamte toh biakkhawmna kizang ngal hi. Biakinn sung a ki-et tuah khak Chiang bangin ki san lingleng geuh mai hi. Biakna kikhop tawp in Pastor' Quarter ah nitak ann ne in, giahna ding chiat ah kikhenzak hita.

*Ni Gukna (July 31, Nilaini):*

3.19 Zing dak 6:30am in Suangdoh a saptuam' school vehna kinei. Programme manpha tak zatzoh in Pastor' Quarter ah zing ann kine. 10:00am vel in Suangdai apan hong pai, Upa Kapzadou kiang ah Suangdai CES a ding typewriter Project tungtawn a kipia leh naupangte a ding thilpiak piakkhiatna kinei. Lungchin CES naupangte a ding thilpiak leng Suangdoh Pastor khut a koih in, 10:30am hiai khua kinuse nawnta.

3.20 Vuahzu nuai ah, lampi hoih khollou lak ah, Tuivel leh Tuivai luite kan in, sun dak 12:20pm in Singngat khua kitung tou hi. Singngat DS Office ah staff te'n puri leh singpi special tak toh honna vaidawn uhi. Hiai ah houlimna hun saulou zatzoh in kipatkhiak hinawn leuleu a, Lamzang CES Headmistress leh Mata Mualtam CES Headmaster kiangah school naupangte' thilpiak ding piakna kinei suk zualzual hi. Huchi'n, dak 3:20pm in damtak in Lamka kitungkihta. Dorcas' Hall ah heutu lian te'n vaidawwna kikhop hon neihpih ua, tour report/feedback piakna leh kipathu genna hun in kizang deuh hi. Vaidawwna annkuang honna bawlsak uh limtak nekhawm in, Mission Motivational Tour zoh ahita.

#### 4. HUN ZATDAN TANGPI

4.1 School vehna peuhmah ah, naupangte leh sinsaktute'n assembly hon nei ua, vaidawwna thugen leh laa sak chihte hon hih masa uhi. Mun khenkhat ah hiai assembly pen a tawpna a koih a ngaihna mun bang leng om. Vehtute lam apan, Coordinator, Team Project Nehemia in hun saulou hon la in, naupangte leh sinsaktu lak ah, Tour Team te' hong kipatna, vehna ziaak leh poimoh dangdang te tomkim a hon gen in, naupangte a ding thilpiak kipawte piakhiakna hon sai zel. Director (I) in gennop a neihte genna hun saulou hon zat zoh chiangin EBCC Delhi Pastor & BYF Adviser in tomchik thugenna leh naupangte leh sinsaktute a dia thumsakna hun zang zel.

4.2 Tuateng zoh ahiehchiang in, naupangte leh Tour Team te group 2, 3 ahiehkeileh 4 (Class tam ana omna deuhthe ah) tan banga kikhen in, interaction hun nuam leh manpha tak zat hizel. Aneu diak group te (Class -I apan anuailam te hi tangpi) thugen ngai thei nailou, attention span tom chikchik te laa khawng sakpih, amau theihshiam ding dan a sianthouna toh kisai khawng hih leh sweet khawng hawm in hun kizatpih. A lianzaw deuhthe (Class-II apan Class-IV or V), thugen ngaikhe thei zodeuhthe ahiehleh, Bible a tangthute leh Khovel a mi thupite' tangthute bang tom chikchik, lunglut huai theipen dia genpih, tuate tungtawn a laisim, thuman leh kuhkal a poimoh dan te hih in, action song sakpih, a hong nungak/tangval chiang ua bang hih/sep ut uhiam (aim in life gen thei nai taktak lou, mit a muh leh bil a zak te uh tungtawn a ut ana neitheita) chihte khawng dong in hun ki zatpih hi. A lian lamte (Class VI apan tunglamte hitangpi) ahiehleh, a aim in life khawng uh dong, tuate bangchi tun theih ding, bangchi panlak a, bang subject te siam kiphamoh hiam, chihte leh career focus deuh a motivate theih dandan a houlim pihna neih hi uhi. Lungkelou a naktak a lai hon sim ding, laisiamna tungtawn a khosakna haksa leh nu-le-pate nekzonna gimhuai tak apan suahtakna lampi om ahiehdan te gen uang in chouna ki bawl hi.

4.3 Huai sungin Delhi Pastor leh Director (I) makaih in School staff leh Managing Committee om thei teng banah khosung nu-le-pa omkhate'n staff room khawngah interaction manpha tak ana nei zel uhi. Khatvei thu a hiai teng pai khawm ziahziah dan ahi. Naupangte toh hun zangkhawm te'n lah nuamsa, pichingte toh hun zang te'n leng gen ding hau thei mahmah a kihi ngei ding, hun chihzah chet zat chih om thei se lou hi. Minute 30 sung a zoh dinga ki plan bang, dakkal khat khawng hong val kha theizel dan ahi.

4.4 Pastor heu a ana houlimte lak a kigen tangpi ahiehleh school maban ding toh kisai hi deuh: bang chieh siamsinna tua sanga quality neizaw a paipih thei ding, naupangte' personality development bangchi a etkaipih zou ding, bangchi'n mahni kitoudelh school i suak theidia, chihte ahi.

4.5 Huan, giahkhakna Saptuamte toh biakkhawmna hun zat ahiehchiang in, Saptuamte' kiangah thilpiak (wall clock), EBCC Delhi 20th Anniversary publication Kumtawn Suangpi bang kipe zel hi. Pastor Nenglian in thutak genna hun zang zel. Director (I) in leng hun saulou hon la zel in, Tour Team te apan lapawl sakna, Delhi Saptuam leh Project Nehemia toh kisai report piakna leng omzel.

*Pastor' Thupuak Tomkim:*

4.6 **THUMAPI:** Delhi apan zoudawn veh a kuante' va kuanna ziak, khopi apan chih hang a, mituam hilou, i mi-le-sate mahmah phetlou zoudawn a piang leh khangkhia a, kum bangzah hiam nung a va siik bangle tampi ki-om ahih dante gen. Khopi a omte'n zoudawn a unaute kimangngilh lou ahihdan; tua zoudawn sinlai naupangte leng Delhi leh khopi tuamtuam a maban a neitheite a hihman un, nu-le-pate'n tate siamsinna ah lam-et-na toh hahkat pih ding in hanthawn. A laisimte uh theihshiam pih banlou, a buainate uh hilh theilou hile hang le, lunglut pih, tutpih poimoh; tulai sum-le-pai haksatnate'n hon daal nawnlou, laisiam thei, siamzawk lunggulh te a dingin, ei bangtan hiam ana tung peuhmah le hang, aban hon sensak ding, a thawn a lai hon simsak ding phetlou laisim man ding hon pe ding adim a om hita. Huaiziak in, tupna nei in kuhkal leh chitak hong pang ding leh hiai thute a va hanthawn ding a kuan a ki hihdan gen. Delhi EBCC Saptuam toh kisai nounel zodeuh leh Pathian vualzawlna toh khangtou zel ahihdan leng gentel zel.

4.7 **THUTAK:** Tukum i Saptuam' thupi, "Thouni In, Lam Ni" chih pansan in, mimal khalam kitunding nawna leh kilamtouhna thu gen tangpi. Kisakthak ding, lamthak ding tampi omte lak ah, Rev. T. Pumzathang in, eilawi' miphakna ding a lampi nih om ana chihte - (a) Laisiamna lam ah leh (b) Kha-miitna lam ah – naktak kisuuk in mite phakzoh theih ahih dan gen.

4.8 Ei' kitundingna leh mi' kitundingna ding a poimohte kibang vek lou hial ding ahihna ah, tehna dik leh diklou khenkak ding poimoh ahihdan naktak in gen. Tulai khovel' tehna dikloute kizousak a tuate a kilamtoute himai lou ding, tehna dik a kilamtoute hizaw ding in Saptuamte hanthawn. Hauhsakna leh i thil poimoh ngaihte Pathian' tehnan toh a kibang hia chih ngaituah ding, neih-le-lam leh hauhsakna khawng ah, mite' neih bang-bang va neih sawm ding hizolou a, Pathian in ei' a dia kihun asak bangbang hon piakte lungkimna toh a keem mite detdou zaw ahi, chi. Pathian' lungput zong a, Ama' thunuai a kitunding sawm ding ahihdan, taaksap hun a leng Amah muang leh beel ding, Pathian 'Pa' a neih petmah a neih ding in Saptuamte hanthawn. Pathian in kitundingna dia a ut-ut zangthei ahi chih mangngilh lou in, tua kitunding thak nawna ding a khawl maimai thei i hihlough dan leh, kuhkal tak a malam a, hatlou sasa a leng khawllou a pai/kikhiin ding in Saptuamte naktak in hanthawn hi.

## 5. MUHDAN LEH THUSUN KHENKHAT

5.1 Mission Motivational Tour a hohte, siamna tuam biik nei a zoudawn siamsinna leh Saptuam' school te enkhia (study) bawl, fact finding team hilou hi. Huai naksang in, naupangte, sinsaktute leh nu-le-pate hih theih dandan a hanthawn dinga va kuan hizaw uhi. Huchih kawmkawm in leng, kipahhuai leh awlmohhuai sak khenkhatte hong ki gelhkhia hizaw hi.

*Infrastructure:*

5.2 Zoudawn a i Saptuam' school te taksap tampite lak ah infrastructure a lian mahmah khat hi a muh ahi. Infrastructure i chih chiang in a school building kia mai hilou a, naupangte leh sinsaktute vanzat poimoh tuamtumte leng huamkha hi. Hiaite atamzaw tham sutuah zou nailou hi hang. Mahni kitoudelh zou ding school neih ding bang tuh gamla mahmah lai. Hiai toh kisai in Dorcas' Hall inleng, tua sang a bangchi leh local level involvement hoihzaw bawl theih ding hiam, khomite neitu hihna (sense of ownership) pekawm a pankhawmna (collective effort) tungtawn a infrastructure lam mahmah leng puah leh maintain thei ding hiam, chih ngaihtuah a existing system etthak ngai omte en thak a tha thak lak kiphamoh kha ding hi.

5.3 A taksap teng uh va suktuah sak zoh seng ding hikei mahleh, a poimoh biik leh naupangte'n neikha thei le uh chi a deihsak huai mahmahte tuh:-

- (i) **School Library/Book Bank:** Jr. High School omna teng bek a koih zoh hi henla, break/recess kal khawng a naupangte'n a va et/sim theih gige ding uh, weekend a leng a khel theih ding uh. Laibu hoih leh mantam taktakte koih pah leng ngailou a, milem thupi leh muhnophuai deuh bang, ahihkeileh a laisim uh/GK khawng panpih thei dingte koih pat ding. Lower classes a ding bang, lem muhnophuai leh lungluthuai thei deuhte, Bible story, classic stories for kids chihte khawng deihtusam huai. Naupangte laibu toh kithuah kha tam himhim le uh, asung a kigelhte theih utna apan laisim utna chi hong piang thei ding in gintak huai hi. JB School te ah leng tuabang amau toh kituak ding laibute koihna Book Bank om thei leh deihuai sak in om mahmah.
- (ii) **Sanitation/First Aid:** A tangpi a et in, Tour in a totkhakna kuate ah, government lam apan damloute etkolna ding (basic health care facility) kingakna tham bangmah omlou; a omsun te leng function lou. Huaiziak in, i Saptuam school te'n a hithei tan in, hiaiam bangle awlmoh in neithe le hang lunggulh huai sak in om. Naupangte leh sinsaktute damlou guih, kisuliamkha, chihte a ding bek first aid vanzat om thei henla, tuate administer thei ding sinsaktute lak apan bang seek hithei leh. Huchimah bang in, naupangte leh heutute' dawn ding tuisiang kiningching school a om poimoh mahmah a muh ahi. Banah, zun suak, ek suak te'n siangthou tak a thak theihna ding uh facility kichian omsak theile hang dei huai. A omsa te leng siangthou tak, natna tuamtum piang lou dia kep poimoh.
- (iii) **Building & Partition:** A building mahmah leng tua sanga puahzawk ding kitasam tampi om uhi. School a ki honna nana ah, building puahna leng tuasang a awlmoh zawk kitasam a hikha maidiam, hon chisak. Tuang (floor)



ding a leilak mah sen te a ding in, vuahzuk hun a buannoi leh nipi-nisat Chiang a leivui khu ding ahihna ah, damtheihna lam hon sukha ngei ding hi. Classroom partition kichian omlouhna ah, teaching leh concentration subuai pha mahmah a muh ahi. Hiaite tua sanga kituup zaw omsak dingdan ngaihtuah poimoh.

*Sinsaktute:*

5.3 A tangpi a et in, teacher tamzaw te kipiakzohna leh kuhkalna thupi kisa petmah hi. Amaute group le (4) a khentheih hi'n kimu-

- (a) **Group Khatna:** Kipumpiak, naupangte awlmohna nei leh a poimoh bang sinsak thei ding a chitna/essential qualification nei, morality lam a leng et-ton tak.
- (b) **Group Nihna:** Kipumpiak, naupangte leng awlmoh veve, ahihhang a out-dated ta, effective zou nawnlou.
- (c) **Group Thumna:** Awlmoh tei, pan theih dandan apang sam, hilehleng naupangte sinsak ding hial a chitna (essential qualifications) nei zoulou deuh, phattuum ding bang a phatuam zoulou.
- (d) **Group Lina:** Part time job dan a ngai, sum bangzah hiam muh theihna ahihnak leh chih dan a sem, qualification & morality lam a leng lungtun huai zoulou.

5.4 Naupangte mahbang a sinsaktute leng, limitations tampi tak nuai a awlmohna toh sem ahihman un, amaute dinmun theisiam zawsem a, poimoh ahihdan uh, I gam leh nam leh Saptuum maban ding seektute ahihdan uh kichian tak a theisiam sak a, amaute naktak a taat hiam (equip) kisam mahmah hi. Naupangte'n siamsinna hoihzaw (quality education) a hon ngah theihna ding un hiai poimoh lianpen tuh hiai ahi. Permanent teacher te kia hilou, Casual teacher te leng tuabang a taathiam sem kiphamoh. Sinsaktute' taaksap deuh hi a theihte-

- (i) **Capacity Enhancement:** Tulel a EBC Headquarter in training programme a sai zel te hoih in manpha hi. Himahleh, sinsaktute tengteng, avek ua training pia/sawl zou gige lou peuhmah ding. Banah, tua sanga hun leh resource kiseeng te productive zawthei ding hiam, kisinsakna paisawn zel dingdan structure/system detdou zaw bangchi neih theih ding, chih ngaihtuah kawm a lampi ding zon tuak mahmah hi. Etsakna dingin, tulel a i Headmaster te, qualification lam a leng suan tham leh prospect nei a i theihte teelkhia in, amaute sinsakna hoihtak (intensive and extensive training) piak ding



dan plan kichian tak bawl in, Master Trainer suahsak theih ding hi. Mi tampi leng teel ngai pah lou a, Division chih a prospective deuh, siamsinna lam mah ngai poimoh hi a theih deuh mi tamlou bang telkhiak masak theih kha ding hi. (Hiai pen EBC SCHOOLS FIVE YEAR PLAN 2012 – 2016, nuai a Khenpi IVna toh kibang kha mohlou ding hi). Amaute pen sinsaktu dangte training pesawn thei dia equip ding. Exposure bang leng a tamthei lam piak a, tulai khovel kisinsakna lam a thilthak, danthak omte bang theih sak ding. Etsakna dingin, National Curriculum Framework (NCF) 2005 toh kisai, India Dan a corporal punishment phallouh ahik tak dan leh adang dang. Huchibang a Master Trainer hiamtak i neih te'n sinsaktu dangte sinsakna pesawn theita ding ua, a lunggulh huai gige zoudawn a quality education neih theihna bul kipatna hong hi ngei dia lam-et ahi. Tulel dinmun in ahieh, permanent teacher training a tel a tamzawte'n leng a seppih uh casual teacher te piak-sawn/share kha theilou uh adiam, chih in om hi.

- (ii) **Subject Knowledge:** Teacher te tamtak amau subject hilh pen mahmah leng deih bang a command/thei zoulou pawl om ua muh ahi. Hiai limitation in naupangte sinsakna apiak ding zah uh pe zoulou ding uh, chihna suak a, naupangte a dinga supna liantak hikha ahikman in, subject knowledge mahmah leng a ki update theih dingdan uh ngaihtuah pih kism kha ding hi.
- (iii) **Casual Teacher:** Local School Committee in a lak casual teacher te awlmoh huai uhi. Kumteng a teacher kikheng, kum khat leng semlou a tawp chih bang om tham a muh ahi. Amau mah in leng kumkhat ka'n sep sawmlou, sem kha nawn dia leng kigingta lou chihte tam ding hi. Sinsaktu kikheng kheng in naupangte' siamsinna subuai kha mahmah ahikman in, casual teacher ding bang leng a lunglut leh pang sawt peih ding deuh, loh tam leh tawm a kinga lou ding deuh bang laak hithei leh deih huai mahmah. Hiai toh kisai a buaihuai nawn mahmah bel, teacher te loh tam pe zoulou, kuamah teacher ut omlou, a utte lah ei deih bang zoulou, chih khawng dinmun ahikna ah, teacher lungtunhuai lolou 2 neih sang in, a lungtunhuai zawdeuh 1 nei in a loh bang leng tam zawdeuh pe le hang bang achi dia, chih ngaihtuah tham ahi. Loh tam piak zawk deuh ziak a sinsaktu hoieh zaw deuh neih theih di bang ahik a leh, naupangte'n a phattuampih zaw peuhmah ding un gintak huai.
- (iv) **Teacher Recruitment:** Saptuam in teacher a lakte direct appointment hitangpi a theih ahi. Teacher khenkhat full commitment nei hilou, short term employment dan a ngai a sector dang a job opportunity om hunhun a taikhe dia mansa chih bang om kha thei. Tua kia thamlou in naupangte adia leng etton taak dia hinglou – khamtheih guihtheih khawng a kibual

leh morality lam a leng demkai mi lakkhak om thei hi. Appointment kipiak nung a kipaihkhiaak haksa ta ding ahihman in contract basis khawng a sin-saktu ding lak hi henla, etsakna ding in contract period kum 3 chih bang, hiai hun sung amaute training piak leh etkhiakna hoihtak neih hizel leh. Contract period a bei chiang a commitment nei taktak leh taktak lou bangle hong kithei ding a, lungtun huai huntawk i sakte permanent appointment piak theih ding uhi. Lungtunhuai zoulou deuh i sak bang omleh appointment piaknawn louh mai a, EBC School a kum 3 teacher nna sem ahi chihna certificate piak a release mai ding.

- (v) **Teacher-Student Relationship:** Naupangte'n sinsaktute' thu mang petmah ua muh ahi. Sinsaktute, abiik in Headmaster, fel deuh omna schoolte ah, naupangte leng tei deuh uh bang hi. Hiai in a reflect mahmah a muh tuh, ei context ah, sinsaktu ichihte pen, school a lehkha (subject) hon hilhtu mai hilou, thil bangkim, salam-khalam a leng role model ahihna uh langsak mahmah a theih ahi. Himahleh, chiamteh ding a poimoh tuh, teacher-student relationship a hoih na ding in, teacher-te naupangte'n a sikha lauh thoh mai ding uh hilou a, teacher te'n leng amaute command thoh louh ding, guide thoh ding hizaw hi. Teacher te'n naupangte a kizahtak sak ngeingei ding uh ahi; ahihhang in kizahtakna pen lohkhiaak thoh chi hi a, kiphutluh thoh theih thil hilou hi. Huaiziak tak in, sinsaktute'n naupangte etkolna uah **disciplinary action** sang in **exemplary action** lam uangbawl zawk hithei leh hoih mahmah ding hi.

#### *Naupangte:*

5.4 Kuapeuh i pianna leh khankhiakna environment toh kituak a khang(tou) kihi ahihman in, zoudawn a naupangte leng tuabang mah hi uhi. Limitation tamtak nuai a si-amsin ahihna uah, a intelligence/IQ uh bel sang lodia lam-et theih hilou hi. IQ/intelligence average tangpi ua, himahleh attentive thei petmah uhi. School khenkhat ah bel ana bright leh kizepdan mai apan leng fel deuh dia theihtheih mai om tham ua. Sinsakna leh ki-etkol dan hoihzaw pezou lehang tua a dinmun sang ua hoihzaw thei tham ding; huchibang mah a, tua sang ale niamkiakzaw theilai; leh, tulel dinmun a leng omtou nilouh thei uh hi a muh ahi. Gamtat-khohei (manners) lam toh kisai ah, a tangpi in khota naupang lungsim ngeina - zahkaina leh kimuannamlouhna - nei lian uh hi'n kimu. Huchi bang kawmkal a ana tualtei, gamtat leh omdan kilawm innsung leh kholak a leng sinsak a omkha khollou ding hunkhop leng om dia gintak ahi. Hiai naupangte hong khankhiakna ding kingakna sinsaktute, nu-le-pate hipetmah ahihna uah, amaute naktak a panpih theih dandan a pan-pih kisam mahmah uhi.

*School Kivaipuak dan:*

5.5 Hun sawt kizangkhawm hetlou ahihna ah, kichian tak a theih tam kei mahleh, school kivaipuak dan toh kisai ah leng, stakeholders – abiik in School Managing Committee, nu-le-pa leh teacher te, Division level makaite ban ah Dorcas' Hall – naktak a pankhawm siam kiphahmoh ding hitah e, chih hon musak mahmah hi. Dinmun khat apan dinmun hoihsem deihna khovel ahihna ah, school kivaipuak dan, naupang sinsak leh etkol dante lungtun huai lua chih ding hikei mahleh, ground reality toh et a hiai sang a hoihzaw va lam-et na dan omtuan lou hi. Ahi dandan pomsuk mai ngai ahihna mun tam a, school khenkhat naudonna mun petmah hi a, semtute'n leng ahihtheih tan ua sem, thu-le-la sinsak, hoihtak a kidon thei uh bel hi. Ahihhang a, lailam bangmahpi kihilh khe zoulou, naupangte theihna niam, competitiveness omlou, sinsaktute'n naupangte lunglut taktak leh mat bat di tan a sinsak thei tuanlou abatna mun hunkhop om hi. Ana khopi zawdeuhte ah bel, naupangte leng na kihongzaw ua, competition le om zaw hi a muh ahi. A lungkiat huai lam a gen hilou in, huchi bang kal ah le hong khusuak bel om veve ding uhi.

5.6 Siamsinna poimoh dan nu-le-pa te mahmah theihsiamsak poimoh petmah hi. Parent-Teacher relationship leng bawlhohi zawk sem kiphahmoh.

*EBC Headquarter Panlakna:*

5.7 School & Siamsinna toh kisai a l saptuam EBC Headquarter awlmohna leh panlakna thupi lua hi. Tua ahih kawmkawm in, panlak dan – policy and implementation toh kisai bang etthak zek tuak om kha ding hi. Tamlou abanban a taklat ki ut hi.

5.8 Five Year Plan: Plan kichiantak nei a pai l hihna ah kipahhuai lua hi. Ahihthei tan a hiai Plan implementation leng etkai leh pichin sak lunggulh huai mahmah. Five Year Plan Khen VI na a kigente bang hoihtak a sepsuah thei hileh abiik in naupangte'n phattuampih mahmah ding ua gintak ahi. Tua sepsuahna ah, school dang ei saptuam a hiselou, kingakna taak omna mun a ei a koih teitei louh a, a omsa kiakniam lam manoh om leh tuate leng plan a om bang a lakkhiak mai, ahihkeileh standard khiakniam chihte quality education i piakzohna dia sepsuah ngam ngai leng hikha ding hi.

5.8.1 Case khenkhat enzual le, Sinzawl CES naupang haupen pawl hi ding hi. Hiai khua ah, Saptuam dang i.e, PCI bang in school kineih tuamlou a, a naupangte uh CES ah hon kaisak thei ua, tuaziakin naupang leng tam in, High School piching tan tungthei school i neihsun te uh lak a khat suak hi. Hiai pen kua' saptuam chih omlou a naupangte'n a kibang hamphatna atan uh ahi. Saptuam chih in school kineih tuam hile uh Class X tan hongkhe zou omlou maithei, tuabang hitaleh a suploh ding ei naupangte leng hi, amau ate leng hi veve ding uhi.

5.8.2 Saptuam dang hiam, government school ei saptuam' school sang a kingakna taakzaw omna ah, i saptuam school lakkhiak or sukniam ding hitaleh, khua bangzah in hiai policy a implement thei ding ua? Implement thei hetlou maimah a khomite apan daalna hiam, kiphinna tan bang om ngei ding a theihsa, amaute voice (aw) va nawlkhin sak hak-sapi hi ngei ding chih haih vuallouh ahi. Singtang nu-le-pa mawl taktakte, mahni tate' adia hoihzaw ding bangleng theisiam theilou tamtak om ngei ding uhi. Aziak tampi om tham ding, tuate zahtak sak kul veve ding hilai. Ahihang in, I policy te lunglut huai sa a paip-ih touni chi taktak I hihleh lungkelou leh nakzaw sem a campaign bawl touh lai, amaute nak zosem a reach out leh theihisiam sak poimoh petmah ding hi. Lampi khat om thei dia gintak bel: hiaibang dinmunte ah, Project Nehemia in leng awareness campaign ichi hia, sensitization program khawng ah pan theihna nei sam kha ding hi. Khopi a mi-le-sate' gen a phatuam ding bang ahihleuh tuh, panlak dingdan om tham kha ding hi.

5.8.3 Lampi dang omthei nawn dia gintak bel: Policy implement thei ding khua zonkh-iaak ding, huai khua a pat ding, agah muhtheih om ngei dia panlak a, kho dangte lak a huai example a zat ding, kum 5 sung a kho 4 hiam, 5 hiam bang a ihihzoh leh hoihlua hi ding hi. Policy bawlsa a sepsuah omlou a tawpkik ahihzel louhna ding in.

5.8.4 School koih nasa a lakkhiak nawn pen thu buaihuaipi ahihziak in kho neu nou-nou khenkhat a school mawk koihkoih louh hihen la, huai ban a khua kibang lou ahihang a khe a paiphakna(within walking distance) te ah leng school koih thua hikeileh, Etsakna - Bukpi & Bukpi Bethel, Tuilakzang & Bualzang.

5.9 Education Hub/Centre: Sinzawl CES etsakna in i lata. Naupang tamna pen ban ah, zoudawn adia hostel I neihna sun uh leng ahi hi. Kisaktheih pih huai tham leng ahi. Tua ichih hang in, haksatna tampi mahmah toh ana run uh ahihdan va muh in lungsim hon dawt hi. Abiik in, Hostel facility pen tuasang a phungvuh zawk a, kiningching zaw leh belhtak zaw dia run theihdia puahphat lunggulh huai petmah hi. Huai hileh, kho kiim a ten leng hon naih zaw lai ding ua, khangtoun in I deihtusam gige quality education ngahtheihna mun hong suak ngei ding hi.

5.9.1 Hiai Sinzawl CES model a zang in, kho lian deuhte leh tulel dinmun a Jr. High neihna te nih leh thum bang puahpha in, hostel facility leh infrastructure dangdangte kiningching toh phungvuh in set up la hang, naktak in phatuam in zoudawn siamsinna tund-inna hi ngei ding in ki-um tinten hi. Sinzawl a hiaibang school, kum teng a Class – X result hoih pianna I neih theih leh, mundang nih leh thum bek ah pat beh le hang, hithei ngei ding hi. Thamlou in, a lunggulh huai gige self-sufficient/supporting school neih theihna ding lampi omte laka khat leng hikha ding hi. Tuabang a I puah school omna kuate ah, village economy leng hong hoihzaw ngei dia, naupang siamsin ding leh sinsaktu ding Pathian in hon pe mahmah ding hi. Kitundinna ding a poimoh penpen-te lak a khat houh ahi mai diam, chih ngaihdan kinei hi.

## 6. THUKHITNA

6.1 Hiai Tour ah school 17 leh saptuam 5 te veh in om uhi. Tuat lakah, tawmchik petmah te Project Nehemia in a phungvuh khak hi ua, atamzaw thamte hamphatna ana tang kha nailoute hi uhi. Tour Team te leng, mi lian mi lalte khualzin hi hetlou napi'n, koi mun peuh ah hon ngaina in honna kipahpih thei mahmah uhi. Pupa ngeina leh zindou siamnate suah in minister/politician te khualzin sang mah inle honna kipahpih zaw le uh kilawm hial hi. Vehtute apan lam-et ding bangmah om hetlou napi'n Pathian itna ziak a kithei ngeiloute sanggam banga honna bawl a, ki ngaina tak a om theih khawng thupi dan muh thakthak in om.

6.2 Zoudawn a i mi-le-sate dinmun, khosak dan leh nektak zonna va muh mai in zong, khopi khawng a omte' hamphat dan tampi hon theisuah sak hi. Zoudawn a i naupang fel leh ngaih huai taktak-te, mel-le-puam leh pilna-siamna ah leng ei sang in a niamzaw tu-ankei uh; ei banga hamphatna a ngah khak louh ziak lel uh ahizaw.

6.3 Project tungtawn a sum-le-pai kipekhawm siausiaute, Pathian in vualzawl a, a thawmging ngaih kia hilou in mite lungsim khoihkha hi. Government sum a crore a sim senna leng gahsuah muh ding omlou a muih tampi tak om hi. Himahleh, Project Nehemia tungtawn a tu a kum 5 (nga) na tan a dangka Rs. 5 lakhs vel lek ki pekhete'n impact neizaw a, gahsuah thupitak leng hon nei ngei ding hi. Project neitu leh hiai adia pangkha thei tu-ailai leh saptuam mipi hihkhak hamphatna ahidhan phawk thak a, naktak a panla zom zel dingin hanchiam ni. Zoudawn in hon sam lailai hi. Nungngat san mai thei hikei hang.

~oOo~

*Huan a kiang uah. I dinmion uh heihleuh dan na mu ua, Jerusalem a siat khit dan, huai konspite meia a kat khit dan: simmaha I om nawn louhna dingin, kisa un Jerusalem bang I lam nawn ding uh, ka chi a.*

*Nehemia 2:17*



